



PARLAMENTO
NACIONAL
República Democrática de Timor-Leste

INTERVENSAUN POLÍTIKA PREZIDENTE PARLAMENTU NASIONAL **“Primeira Sesaun Sexta-Lejizlatura Parlamentu Nasional”**

**Ilustres Deputadas no Deputados,
Povu Doben Timor-Leste,**

Agradese ba Nai Maromak, Rai Lulik no Matebian sira hotu tanba ho tulun no bensaun, hodi nune'e, ohin ita komesa tama iha faze foun-ida hafoin ita hakat liu tiha Eleisaun Prezidensial no Eleisaun Parlamentár iha tinan ida ne'e. Ita-hotu orgulho hanesan Timor-oan tanba kontribui ona ba prosesu demokrátiku ho matenek no maduru hodi jere diferensias, partidus politikus hotu-hotu mantein Pás no timor-oan nia unidade metin no sei forte ba beibeik.

Iha faze foun ne'e halo Estado Timor-Leste no Povu bele hiit ulun, hateke do'ok ba oin ho Fiar-Án, sai orgulho núdar Estado ida ne'ebé independente no demokrátiku. Hodi dignifika mártires da Pátria sira nia mehi, hodi lori Povu doben Timor-Leste ba moris diak iha Estado de Direito Democrático.

Hanesan segundu órgaun do Estado, Parlamentu Nasional iha Sexta-Legislatura simu naha-todan tanba tenke konsolida hikas ita nia instrumentus legais sira, atu responde ejizénsia povu nian. Tanba iha tempu naruk ita hotu hare no rona, povu lakohi atu hein kleur tán.

Iha oportunidade ida ne'e; ha'u hakarak partilha ha'u-nia agradesimentu wain, ba konfiansa no fiar, ne'ebé mai husi Prezidente Partidu CNRT Maun Bo'ot Kay Rala Xanana Gusmão ho Sekretáriu-Jeral Francisco Kalbuadi Lay, no Partidu Demokrátiku (PD); ha'u hakru'uk ba Estrutura tomak Partidu CNRT no PD, militantes, aliadus, simpatizantes no Povu tomak ne'ebé fó ona fiar ba Partidu CNRT hodi lidera Parlamentu Nasional. Konfiansa ne'e sei la monu-ba-rai. Konta mós distibtos deputadas no deputados sira hotu nia apoio iha alto plenáriu sexta-legislatura ida ne'e, halo ha'u fiar metin, ita-hotu sei hamutuk halao mandatu tuir de'it Konstituisaun haruka - núdar lejizlador, fiskalizador no desizaun polítika.

II

Ha'u kompromitidu sei fó continuidade ba servisu hirak ne'ebé lao ona husi Prezidente Parlamentu Nasional sesante, sei mantein komunikasaun ho sira, ha'u mós sei dere Bankada idak-idak nia odomatan no deputados sira idak-idak, hodi konsolida di'ak liután funksionamentu órgaun lejizlativu ida ne'e. Parlamentu Nasional alem de tenke sai órgaun povu nian, iha fatin ne'e duni, ita-hotu sei dignifika órgaun lejizlativu ida ne'e ho produtos lejizlasaun no polítika ne'ebé aposta ba desenvolvimento inkluzivu.

III

Dalan lós liu maka ita sei hamutuk hakat ba mudansa, hametin relasaun di'ak ho órgauns Estadu sira seluk, liu-liu ho Governu, no instituisoins sira seluk hodi servi di'ak liu ita nia povu.

Ha'u fiar metin; hamutuk ho distintos deputados 64 iha Parlamentu ida ne'e; servisu komisoens espesializadas parlamentares sei funciona di'ak liután, ita sei mantein relasaun di'ak ho Partidus hotu-hotu, hametin relasaun ho media no ONG sira, ita sei fortalese relasionamentus grupos amizade parlamentares ho País sira seluk; ho País

ASEAN nian, Komunidade Lingua Portuguesa CPLP, AP-CPLP, IPU, APA, AIPA, no Paizes membrus do g7 plus (g7+), no seluk-seluk tán.

IV

Atu termina, apela ba komponentes sira hotu; liu-liu ba funsionáriu Parlamentu Nasional, assessores, téknikus apoio bankadas parlamentares, seguransa no kontratadus iha ámbitu Parlamentu Nasional atu kolabora malu, tenke servisu hamutuk – hametin team work no presta ita-bo’ot sira nia dezenpeñu, ho dedikasaun, badinas no profesional. Tanba povu hein hela, povu hakarak moris di’ak lalais, ita-nia Estadu ejiji atu rekopera lalais Timor-Leste nia ekonomia no joven barak tebes hakarak oportunidade ba empregu, no setor privadu presiza ambiente negosiu ida ne’ebé saudável.

Tanba-ne’e Parlamentu Nasional tenke foti papel núdar instituisaun catalisadora ba próximo Governo atu servisu ezeutivo nian la’o di’ak, Governo mai ne’e tenke lori programa ida pro-povu no orsamentu ida ne’ebé mak bele responde duni povu hodi hetan moris di’ak.

Hakuak bo’ot ba imi-hotu.

Obrigado.

Díli, 22 de junho de 2023,
Prezidente Parlamentu Nasional,

Maria Fernanda Lay